

心

知

堂

詩

稿

心知堂詩稿卷十二

成都汪仲洋少海

萍梗集

起庚午二月迄壬申十二月成都叙州保安閫中作

葬前室朱氏

貧賤多別離功名誤妻子青衫憔悴歸撫棺異生死誰
言衾枕親茫如一夢耳愧悼餘中懷耿耿不能已坏土
手自封佳城壓止水皎皎天可誓同穴義猶在叶遲之
數十年僵臥亦如此無物持殉君悼亡詩一紙

將之叙州有作

五年京洛歸不識家所在貧賤無安土茅屋屢遷改入
門更何見骨肉雜悲喜蕭颯及鬚髮阿兄老如此零落

餘膏沐嬌妻亦已死願願如我長跪拜皆猶子團圞百
餘日匆匆束行李百年能幾何盡在別離裏自從弱冠
來不得住閭里吞聲復出門一棹故鄉水

與君爲新婚燕婉緣恩義於君何容心而我適遂志五
載張空幃千里馳歸騎結髮念阿姊繼室思同氣艱難
衆口阻委曲始成議新絃雖已調故劍有餘思諒在同
根生惻惻喻斯意今我非好遊飢驅不得憩努力愛春
華歸期及守歲當時新婚別阿姊亦隕涕

寄題何竹友竹醉圖

名椿齡
金堂人

先生愛竹如愛酒先生愛酒如愛友先生醉友非醉竹
先生醉竹非醉酒頽然畫作竹醉圖冷翠寒煙香到口

城南把臂讀書時秋聲繞屋青離離君行卽應有此畫
我行卽應有此詩不審如何兩不省但憶把酒酹竹同
致詞酹竹願爲璞中玉爲瑜爲瑕不受琢空山顧盼生
光儀溪泉隨意臥秋綠酹竹願爲雲中龍一爪一甲皆
騰空霖雨蒼生灑徧了翻身更化爲長虹竹如有情爲
竹壽枝葉低昂似肯首誰知玉抱荆人羞更見龍驚葉
公走旣不能枯又不榮人兮竹兮兩相負瘦骨與竹餘
一身風風雨雨愁殺人當時見君如見竹何時見竹不
憶君彈指便是十年別君在故園我作客飄蓬斷梗游
長安一雙青眼變成白但求看看竹無處尋况欲尋君安
可得風露夜涼秋氣清回首可堪情脈脈長歌一聲歸

去來風塵骯髒胡爲哉入棧便覺心先喜竹樹出沒雲
水隈問竹吾子何處住住在蒼翠淺深處前日軟飽回
家來昨日飢驅出門去貧賤依人眞可憐我亦隨上春
江船窗外雨聲亂人耳今夕何夕對牀眠十年之別路
萬里交游依舊吾與子意中之畫竟若此意中之詩可
知矣我詩與君圖中竹結根飄籜同憂喜曲折在心不
自喻迫急何能揭諸紙勞君遺我一雙鯉中有尺書索
及此題贈此君如是爾

孤女苦

孤兒孤苦不若孤女孤苦孤女之苦苦有父無母女豈
無母母不肯女 母不肯女女有父父亦如女目願母

母怒父不敢女 父不敢女母不肯女伶仃三歲何所
依走見阿姑阿姑淚如雨女飢且餐歸無言姑飼女

登叙州城東夾鏡樓作

金沙江與岷
江合流處

青山飛出兩白龍蜿蜒赴鬪爭雌雄頭角怒牴勢相合
化作一氣雲濛濛雲耶龍耶兩不辨高樓百尺煙水中
不信兩腳踏無地居然把臂凌虛空斜陽倒影波光動
身疑跳入鮫人宮當時相如頗好事沈黎棘道俱開通
旄牛笮馬亦何愛長江險不分諸戎自漢以還二千歲
南窮六詔皆王封壯夫何事擅詞賦聲色不動成奇功
間世生材豈多讓後來遭際誰能同東樓流離嘆杜老
元祐竄謫來涪翁立身天地中有得何須洒淚悲途窮

不見上灘下灘棹歌發風波險處偏從容雙江濁漲氣
洶湧一瀉千里去朝宗蘆花明日散飛雪更照秋水磨
青銅

連理枝詞寄內

多情草木竟連枝不識人間有別離南國可憐紅豆子
一生惟解種相思

代答

無情草木尚連枝不信多情慣別離爲問鴛鴦啄紅豆
可緣此物惹相思

重赴保安

三年兩度出長城傳食諸侯舊有名邊月塞雲應識我

青衫仍是一書生

畱別新州書院諸生

嗟我年甫冠授學在鄉鄙越歲舉賢書傳食從茲始兩
臥我巖雪一飲麗江水數月五華樓四載長安市中間
更出塞前年曾到此誰知波上萍沿洄更相倚交情託
膠漆臭味契蘭芷朔風吹邊馬歸心忽千里豈不重別
離營營非得已

有兄年已衰有妻齒猶少有姪未成立有女纔啼笑一
家何所依四壁秋風峭賴我硯田粟水旱災不到燕蜀
數千里緩急向誰告中夜起長歎歸夢憶顛倒引手彈
刀環一鞭風雪冒多情二三子籌思無以報畱我數首

詩與君永爲好

大道本人理藏於方寸間凡民苦放失君子勤維閑一念不肯肆乃足全其天根本有所立進退皆欣然善則備經旨成效懸史編我材於何近踐始須慎旃學以濟吾用義利辨所先講業緬陸子聞言皆涕漣吾儕慨生晚瞻之若在前

文章一小道妙手通造化越自秦漢來體格日趨下六經麗日月光芒從天射胎源得其意百家皆可跨左國爭用奇史漢力相亞悱惻歌河梁幽憂歎楚些賦亦詩之流揚馬才頗大儷語忽鬪靡四聲隨附和古義誰能復俗見苦難破

和次惺甫夫子見寄原韻

人生如輕萍會合隨流水波浪一飄泊離憂不可洗泥沙與江海但願得所止浮沈難強同聚散從此始

公還我欲去我畱公未歸如何兩相錯茫茫成昨非造化忌情好力使同心違坐令兩孤寂日咏懷人詩千里寄雙鯉尺素療調飢

新詩不可讀字字皆心傷死喪念骨月嗟哉餘斷腸老眼淚枯澁化作鬢上霜撫鏡長歎息引領雲茫茫徘徊不自得吟寄天一方意謂門下客此情胡以忘我欲強慰勸矢口先悲涼

山川阻且長和答如面語惜無五色筆繪畫到肺腑含

意不能盡了了心相許蘭芷間千里臭味誰齟齬秀影
孤亭亭臨風念獨苦

得失有成數榮枯誰與談斥鴳嗤鵬鳥枌榆殊不堪詎
借一枝蔭飛搶弗懷慙我志逍遙游垂天翼怒參六月
雖暫息決皆雲覃覃長風噫大塊九萬將圖南

今年黔山陽去年滇江潯遙聞彼地人居隣成樂土恨
不移蜺旌欲歌江有渚安得雲觸石散作天下雨區區
瞻使星桑梓私相語當時遺愛存終應續先緒

公尊人靜
山中丞曾

爲四川

廉訪

頭巾若積鐵重壓山不移自應賢書舉十易春秋時退
筆已成塚洗墨空有池廢棄甘肥遜弟子殊負師還山

計已決欲發仍遲遲

居庸四十里南口到北口長城關鎖嚴容我從中走青
山鑾馬蹄一步一回首幸有學道人晨夕對杯酒相忘
形迹間濟濟多小友鬢鬢笑未露我亦不成叟
棧路往來慣征衣雲氣多潦倒一身健離憂懷百疴夜
永瓣香熱倚韻成清歌歌成淚雙墮耿耿當如何

附原作

渺渺西山雲盈盈潞河水時有素秋月照人清如洗
君特抱琴來欲彈復中止強作數日歡離憂從茲始

余與少海自潞河
一別直至于今

我自吳郡返君向西川歸九載歸未得歸歟計豈非

羨君故鄉好奈我素心違
心情兩相契慷慨還賦詩
詩成一揮手使我長渴飢

自我與君別骨肉多慘傷
生死永訣離能勿摧肝腸
老眼已枯淚元髮日改霜
從頭思往事回顧皆茫茫
感君情繾綣垂念天一方
手書致慰問厚意胡能忘
封緘寄蜀道寒飈助悲涼

蜀道如登天開緘同面語
故人證襟懷言言出肺腑
爾我非時宜夙昔默相許
閱世多艱難平情亦齟齬
欲言不敢言下筆心彌苦

苦心將誰訴惟君可與談
君今復在遠我情何以堪
謗集力難弭才盡中懷慙
嗟余放黜後仍得隨朝參

臣職亦何補

主恩則已覃春明載春水一舸來湘南

君住錦江城我居蘭江許此間我舊游昔曾紀風土
岷嶓江之源荆漢水爲渚想見巫峽雲化作瀟湘雨
不聞巴人歌下接楚人語一葦可航之或者通情緒
友情未得達使命忽已移不期下車日又是承恩
時依依嶽麓畔森森昆明池驅車出樊口策馬朝京
師戀闕臣子心請命曷敢遲

計余渡蘆溝若當過峽口迨君金臺游余又碧鷄走
邂逅知何時蹉跎成皓首獨坐憶良懽相思酌樽酒
但願戰春闈君作舉旗手更願晏瓊筵兒作同年友

上林春色佳顏然醉一叟

調高惜和寡交真怕情多情多引愁緒愁積成微疴
思君不可極撫琴我且歌獨絃不終曲問君當如何
和答馬籥雲送別原韻

寒雨釀成雪朔風吹亂飛關河千里別書劍一身歸厚
意餘清讌長途嘆素衣浣花溪水上愁絕舊柴扉
毳幕連三衛山城擁一州誰知遼海外尚有管公畱天
地空青眼風塵欲白頭何時歌入塞歸釣著羊裘

題陳體慈年丈慈竹春陰圖

名希孟江
西新城人

煙中綠玉寒森森勁節槎枒撐古今婆娑滿地影飛動
長繩繫日節春陰春陰一竿歌有斐小竹簣簣皆鳳尾

一筍脫縑生太遲秋風已落湘江水湘水東去春不還
化作竹上花斑斑離披合倚望夫石覆蔭力成慈母山
慈母之山高千古不教枝葉受風雨一枝兩枝長成林
峩雲竟作龍蛇舞龍蛇峩雲雲亂翻最小一枝雲下蹲
參天早已具條幹拔地未忍離本根本根堅勁誰能寫
餘蔭今已及門下欲把南山壽此君一片慈雲作廣廈
皐角鋪題壁

長安過夏誤歸期潦倒生平了不疑收拾狂名宜斷酒
消磨才力悔吟詩心窮造化天應忌氣太縱橫福可知
去日苦多來日少眼前孤負更何爲

頭銜手版總依然負舉賢書竟十年寡合差能離世俗

多情不耐作神仙游經雪塞裘彌敝夢近春閨月已圓
明日計程山路盡可堪回首謝雲煙

將赴閩中作

年年硯食笑奔忙纔解征衣又趣裝二月浣花春正好
子規聲裏別江鄉

川北道黎雲屏觀察招游錦屏山

踏破北棧與南棧屐底煙雲綠未散游歷不到閩中城
嘉陵山水只得半憶我渡江前日來中流倒坐船頭看
闌干數折迴丹梯坡隴微斜展玉案軒然飛出雲中屏
摩空翠影到銀漢古樹層層閼洞天疎鐘處處開瑤館
日氣山煙互吞吐十花五色爭燦爛恨不迴棹入圖畫

騰身直上游汗漫有若交臂失英雄中夜念之心曲亂
此意不失誰爲陳失喜今朝侍娛玩小隊洒落渡江水
登高不肯騎款段攜我步步踏雲入數轉已訝耳目換
纔從峭壁通飛楹陡覺軒窗吞彼岸伊古何人大手筆
掃破千山走藻翰曲折篆就巴字文瀟作江流綠不斷
隔江遙見十二樓魚鱗瓦屋皆成貫東風三月花欲飛
炊煙萬縷日初旰迤北山勢如蟠龍雲氣下罩玉臺觀
想見杜陸兩鉅公到此遙遙相唱歎我才遠不逮古人
長歌何能佐燕衍下里巴人操土音試爲使君博一粲

東洪肇甫茂才

萬里橋頭錦水濱一江春綠兩家分當門酒肆同邀月

隔岸歌聲對繞雲古業欲攬陳正字時名肯減杜司勳
無端小別三千日夜夜楓林獨夢君

鴛鴦同夢出西川只在扁舟一葉間雲雨未開神女峽
煙波忽沒小姑山傳聞楚些魂招未想像彭郎鬢欲斑
客裏傷春君較可蓋棺猶及撫花鬢

底事分婚大小喬中年亞壻各魂銷離家詎識醒春夢
下第空憐敝黑貂力盡離披君子竹心枯展轉美人蕉
差欣繼室猶同氣比似歐蘇義有繇

鴻爪雪泥渾不定分馳南北總堪憐錢塘潮湧三更月
棧道雲連一握天乍別記當挑菜後相逢仍是浣花前
離愁莫問誰深淺量取腰圍減去年

內子偕異女至館詩以勞之

芙蓉城裏浣花人不識
駟車宛轉輪志在竹竿依父母
義原瓜瓞走風塵
青山約住歸甯夢
絳帳飛來燕婉春
直待捲堂聽臘鼓
偕卿雙棹渡南津

纔能啼笑便離鄉
不識青山道里長
似苦肩輿行永日
如驚驛舍是殊方
投懷彷彿猶知父
學語依稀解喚孃
掌上明珠差自慰
甯馨豈必定兒郎

鷹

勁翮思秋甚涼飈
厲羽來脫鞴應萬里雲路九天開
奮擊將無敵飢依且自哀
支公愛神駿絛錠日低徊

蟋蟀

振羽難飛去初無面壁情偶然爲熱客不敢賦秋聲促
織心殊切投機語未明待將風露冷在野數歸程

螢

乍醒池塘夢疎簾雨未晴天機隨變易行迹自分明朽
腐憑誰化光芒誤此生草蟲微細甚團扇莫相驚

十三樓晚眺

落日不到地翻空燒暮雲天光餘澹沲霞彩忽繽紛樹
杪鴉收陣蘆中雁引羣倚樓人欲下長笛一聲聞

重游屏山作

青山如有情飛翠入江城卷幔時相見捫蘿畫裏行樓
臺連樹色鐘梵答泉聲不減游僊樂逍遙到太清

漢水不時渡屏山隨意游白雲如愛客遮道苦邀畱
去散飛雨脩然生早秋衣涼思半臂斜日忽當樓
林巒久不到結構益翻新舊路迷黃葉青山笑故人雲
蹊添曲折樓勢助嶙峋處處開生面詩成亦有神
歸鳥沒青天高低暝色連山亭銜夜月漁火破江煙對
酒思今日題詩續舊編何當謝人事來此伴雲眠

落葉六首

將軍大樹老登壇日戰西風未解鞍金甲褪時秋雨重
馬蹄聲裏夕陽乾千山野燒疑秦炬萬幕栖烏弔夜寒
虞詡若行添竈計猶堪熱火誤樓蘭

樹猶如此歎桓溫家在江南黃葉村

蘇句

月色半牀憐去

國蟲聲四壁攪離魂飄搖只合悲秋氣寂寞何堪賦小
園一樣風枝栖未穩歸鴉啞啞話林昏

全椒道士避人行寂寂疎林太薄情荒徑一堆霜露氣
空山無數雨風聲攤開夕照鋪黃海散作朝霞染赤城
寄語仙童莫輕掃中多靈藥助長生

不用防邊與泛槎長亭分手卽天涯蕭蕭去馬空迷路
得得停車當看花桑梓頻年成過客風霜今夜宿誰家
行蹤未及南歸雁結侶衝雲一桁斜

上林楓樹也彫秋畫到宮眉欲綰愁九月寒砧催不盡
一溝寒水倩誰收慵依綺閣聽簷馬淨掃天階望女牛
恰有詩情無處寄嫣紅一片落簾鉤

平林疎瘦響蕭蕭儘有貧家學采樵霜葉半籃和露拾
秋聲一擔帶風燒堆來石徑紅難掃曬到柴門翠不消
可惜離披收未盡半隨飛櫂打江潮

重陽雨後雲屏觀察招游屏山作

雨後屏風潤蒼然翠欲流樓吞西漢水簾捲萬山秋
佩雲中接笙歌鏡裏游何須尋海上卽此是瀛洲
失喜登高處名山候不同雨添秋樹綠霜讓晚荷紅
絕代題餽筆何人落帽風嘉陵三百里都在畫圖中

桓侯廟有斷桅兩楹相傳爲當時摩右將軍旗者
質如生鐵鑄成苔花古馭雨色生斑非唐宋以
下物也

一木曾撐半壁天，斷桅如鐵獨巍然。
摩風遠褫阿瞞魄，溜雨遙從章武年。
是有餘威震殊俗，那無生氣接重泉。
滄桑記否張黃虎，夜見靈旗城上懸。
相傳獻賊圍城日，見候
身坐城上，脚垂及地，駭
散而去。

久不游屏山，木葉成堆，雲峰盡露，如別開生面，以
娛客者。

西風幾度響巖隈，落葉滿山秋已回。
脫盡霜痕迷徑路，掃開煙景露樓臺。
林邊忽訝奇峯見，樹杪欣看列嶂來。
讓出雲嵐仍點綴，嫣紅片片是詩材。

贈桂總兵涵

裹甲曾登萬仞梯，封關何用一丸泥。
籌揜板楯黃陵北，

力縛阡能黑水西雪壓石門歌凱入雲橫銅柱列名題
當時戰馬知矜寵錦陣雕鞍驕不嘶

題王東塋前輩出塞集後

榜花同是第三人一十六科前後春

公舉於乙酉洋舉於辛酉計越十六科矣

老

驢猶能知道路飢鷹渾未辨風塵茫茫世事隨磨蝕浩
浩心源欲問津誰令壯遊天地外杜陵詩格忽翻新
五岳尋常拋過眼崑崙頂上作游仙冰橋雪海原無地
硬雨明霜別有天噩夢一時隨酒醒奇聞萬種借詩傳
槎頭尚載支機石付與君平枕月眠

只帶奚囊不帶刀獨騎驛馬出蘭臯詩情半爲邊笳壯
酒膽偏因戍鼓豪萬里黃雲編外史

公著有烏魯木齊竹枝詞記注風土甚悉

三

年紫塞續離騷昂藏却對鬚眉白想見天山積雪高
幸得生還住玉台故鄉風景自低徊身經宦海波濤出
筆挾邊關雨雪來耆舊傳中增事實草堂圖裏揀詩材
雞林問價君知否應對瑤篇笑口開

心知堂詩稿卷十三

成都汪仲洋少海

匏繫集上

起癸酉三月迄乙亥十二月成都作

自折柳橋宿臨江寺

莫漫折楊柳遠游將奈何
埜雲無意緒春水有情波
斷酒仍如醉成詩亦當歌
未知同逆旅鄉夢數誰多

資中晤張玉溪

猶然落拓兩閒身捷足難登要路津
豪氣未除空使酒才名雖大不醫貧
江鄉講業須吾輩海宇論交更幾人
恰喜望衡三百里分栽桃李各成春

時余將赴永川講席

哭兄

十歲恃父如恃母十一依兄如依父兄念我寒被我衣
兄憐我飢飼我脯有時熒聽怒頑劣扑不能下淚如雨
旁人百計勸廢書銳意不顧今何如我年廿五膺鄉舉
兄年方當四十初掀髯一笑喜成立辦裝趣我赴燕都
是時秋深江水淺一棹未發淚先泣兄言兄弟只兩人
如形與影未嘗遠茫茫計數五千里不識北上何日返
弟雖成名未成室此心耿耿不能展歸予爲弟聘名媛
刀環莫令緇塵浼我跪受辭辭水濱迢迢逐隊長安春
薦士屢荷昌黎賞黜名輒逢元相嗔金盡裘敝歸故國
兄喜迎我出里門調食爲我養憔悴燒湯爲我澆風塵
東隣西舍託媒妁名門望族求姻親桃花滿地春冰泮

駟車宛轉迎佳人燕婉未奪壘麓樂室家已累常棣貧
我既浮沈兄老大百憂煎迫氣不申是時兄年五十二
我欲覲食永川去先日回家與兄別夜分翦燭話家事
匆匆驪駒已在門破曉忽聞兄不豫披衣皇遽走問狀
兄言微寒疾非亟我察面貌神如常我嗅厠牖氣無異
兄趣我行我強畱一日湯藥親身侍晚來霍然如已瘳
舉家色喜笑相語兄曰明發汝長征我已束裝難再停
誰知此別成永訣但覺在路心屏營旅店惡夢殊奇絕
以屋爲帽戴之行倏然柱折牆壁破墮地片片如煙輕
科頭陡覺無蔭庇熒熒魂魄醒猶驚健步追來書一紙
開緘一痛兄死矣兼程迴轡走家門隔棺呼兄呼不起

荆樹半枯色不華雁行失侶聲難擬嗟兄爲我成室家

諸姪婚嫁竟誰恃

兄有三子四女
惟長女適人

嗟兄爲我望科名諸姪佔

畢竟何似中年失勢憐卽嫂垂老無依嘆寡姊宗親都
無負郭田戚屬誰贈指困米生者旣無以爲生死者又
無以爲死三間茅屋秋風中追逋之聲日在耳萬事艱
難我不辭硯田一握憑支持獨憐七尺姜家被秋寒夜
永風淒淒

勗姪

心爲百福原志乃萬事準人禽與聖凡所爭在兆朕方
寸有獨至不假外物引名或千古香事有百代晒要惟
辨義利良不開鈍敏詩書精其識倫紀敦厥本達亦何

所欣窮亦無所忿

惡固知不爲善亦慮不勉歲月如流水一去不可轉爾
曹年已冠氣質猶未變貧賤而膏粱艱虞乃惰懶叔訓
爾毋恚母教爾毋睥縱爾義不可迫爾情先舛愴然念
我兄當飢不能飯

勿謂生事艱氣沮不思奮勿以生事寬頽心不自振賢
豪貴自立不知境逆順爾母鬢已白返哺乃爾分爾室
均未授無後爾宜恨我心雖有餘爾力應各盡前路嘆
茫茫勉旃惟所趁

題鄒龍田明經跨馬圖

名景興四
川威遠人

志在千里氣瀟灑馬如其人人如馬須眉掉顧駿迴風

馬語人語聲相通似與一心商所從欲介鍔甲馳邊功
汗血下染黃沙紅不爾玉勒金羈側天廐長揚羽獵馳
從容南國詩人有鍔獺西京御史騎花驄雲螭月駟各
相亞黃芝白鵠將母同胡爲乎鄉雲衝破棧南北緇塵
染遍京西東翻身迴轡不稱意駿足欲駐彈丸封聞道
桂花香滿空隨君出手攀蟾宮人本如仙馬如龍試詠
霓裳明月中嗚呼試詠霓裳明月中使我伏櫪下駟亦
得望塵思奮而爭雄

寄呈惺甫夫子并柬魯輿

自從潞河別心挂燕臺樹聞道在黔江夢折夜郎路黔
江又燕臺心夢隨所赴公如風中船欲住不得住我如

泥上萍欲去不得去秋來鴻雁飛橫空遞尺素迢迢勉
行脩惻惻慰遭遇長跪讀未竟酸辛淚如注

東坡雖少小志不徒文章偶聞石介詩意與韓富頗一
出廬陵門翩如鸞鳳翔生才固有間所志同皇皇自謂
負奇氣不敢私低昂誰知羅昭諫空笑孟襄陽衣食不
自保何能憂廟堂邇來稟記述采擇窮琳瑯磊落數前
輩言行皆已彰誰禁愧汗下拔劍歌悲涼

奇章阻衛公維州議終阻籌邊志未竟捧檄去天府亦
有張益州撥亂來西土化賊而爲民從容靖鼙鼓遇合
誰能同功名不自主離合久暫間明主諒區處人材偶
黜陟生民關甘苦我編職官志

時分修四川通志專
辦職官人物兩門

喟然嘆

前古

佛以夷化夷移之華則亂試考三代前歷世無民叛自
從夢金人象教來震旦貝葉翻迷津曇花現彼岸奸氓
竊其緒其說彌誕謾中以生所欲懾以死所憚積勢生
妄邪乘機構危難陸地開蓮花詭服畫象象公然闖

九閭短兵事僇悍此變從古無人神奮衛扞雷雨助鎗
礮賊黨遂糜爛事定遐方知入耳猶駭汗倉卒目擊時
非常想驚惋老臣憂國心無由獻襄贊鬢髮日以蒼臨
風一長嘆

秦風吟寺人趙高弄國紀漢史記大閹常侍挾天子禍
烈慨末流機緘兆創始接踵御垂方越世亂無已或以

充監軍將帥供鞭箠或以參平章輔弼伺頤指或以求
傾國瀆倫引禍水或以導微行排闥亂邊鄙南衙北衙
開東廠西廠起大獄空朝臣淫祠遍州里儲貳任廢立
妃后聽生死結黨通黃巾乘危盜玉璽極惡無不爲前
代類爾爾我 朝法制精積弊盡前洗人爲傳宣設
職任奔走耳無從攬權勢不得窺意旨小人伎倆窮乃
敢謀不軌白晝引奸民深宮弄兵矢倉卒定變間
列祖實憑恃遠怨近不孫難養竟如是

天災偶流行荒政古來備秦隴有餓者何至生妄覲其
如爲民牧居官若夢醉鞭撻勤催科飢溺忘撫字百端
驅之亂預爲立功計一朝變端生恇怯多顧忌始無汲

黯仁終乏張湯智羽檄紛徵兵傳聞日以異東將會魏
博西欲竄巴利江鄉怵前事團塞再起議誰知荷白挺
掠食以自衛側聞官軍來跪逆道旁地哀哉駢首誅延
頸對流涕

蜀犬傳吠日叢山聚雲雨往往冬春交豆麥已冒土暮
見雲陰陰朝猶雨縷縷起視隴畝間新綠交撐拄餘潤
泣未乾輕煙澹欲吐似見農夫來懷新相媚嫵但言陸
海腴誰虞漏天補自冬越春仲蟄龍懶起舞爰風吹似
薰烈日酷於暑豆麥未及尺焦枯十過五皇皇基亂階
紛紛食大戶禱祀幸有靈石燕奮毛羽甘雨甦生機涼
意到肺腑寄語田間人侯主伯亞旅勿復忘胼胝盡數

易酒脯餘通三十年王政維萬古

邊隅巫風盛競言事鬼神惶惑易蠢動其來亦有因如
何中州地乃復藏奸人詭製託八卦險謀通九閭滋蔓
八年内怪絕無人聞一朝造器械縣令驚無端徽索繫
其魁黨類競紛然縱火遂刼獄持矛竟戕官東竄任城
道北踏淇水濱蹂躪不稱意還入滑縣門道口木柵峻
司塞凋房堅相倚爲犄角坐待騷中原

天子赫然怒將帥何桓桓關中調勁旅塞上來親軍成
算在胸臆首先攻外援賊勇不據險退出侯兆川伏與
伏相應奇與奇周旋不辨人頭落但見刀光翻賊衆旣
失利賊巢遂雙舉惟有孤城兀長圍防突奔明引雲梯

逼暗穴地道穿九幽燃巨礮九天摧城闔餘賊震未死
就縛如豕狔汚掠餘婦女尚有四萬存藁砧認中饋父
母領愛媛焚香送凱唱重作太平民

龍口燕臺西白泉易水北從遊念往時厯厯猶在臆禽
鳥娛絃歌風雲助氣色心在天地初機與風塵息懷哉
十年來此樂難再得惟餘酬唱詩誦覽恍疇昔魯公雖
暮年細書精鈎畫萬毫出風神一絲露骨力累許書賜
詩合璧成奇特昨聞偶乘暇拂素點良墨盈幘聚珠玉
天涯寄舊識先生何周詳公子倍珍惜臨發虞浮沈畱
待面相擲此意彌懇懇我情殊亟亟致聲代善藏亦無
故隱匿至寶縈魂夢能勿生推測

我有同心人年少如冠玉氣欲吞三江力可扛五嶽夜
夜燃青藜於書無不讀使筆如使刀誰能與之角赤心
付朋友虛懷聽規勗急難不自計重義惟所欲三載不
得見念之縈心曲我本寡兄弟與君爲骨肉所願同雄
飛誰肯類雌伏艱難苦遭際山川嘆綿邈九萬羨鵬翼
衝天薄亭毒祝君雲路開引我海運速他時蓬閣間猶
及手相握

題嚴麗生舍人海雲堂集後

金翅扇海海水立蛟龍頓學枯魚泣巨靈擘山山嶽摧
煙雲化作蓮花開石可補天箭射日斧能修月車推雷
是有神授不相貸通之聲詩亦奇怪二南三雅體各別

八
大呂黃鐘今好在調宮每苦和聲難改調遂使元音壞
風雅正變無不可誰能冥心與古會君從何處飛身來
卓立李杜韓蘇外我讀海雲堂思議弗到驚欲狂擺脫
靡曼非蒼涼此夏聲也不可當萬類勃發暢生趣一氣
陶鑄成混茫竭來足迹半天下風塵湖海隨徜徉願逐
飈車九萬里汗漫上與羣仙翔賡和鈞天之樂章

哭李氏猶女

女而失其母婦也非所天得一旦不可況乃兼其全憂
患迫性命那不中道捐嗟汝生歲餘伶仃遭迍邐誰憐
掌上珠視同贅疣然贅疣成寄生賴有阿姑賢爲汝刮
垢膩乃見眉目鮮爲汝禦風雪乃覺衣裳單恩威一以

變敏鈍如相懸千絲女紅巧七戒閨教嫺貧賤問名少
清高擇配難蹉跎更謬誤草草誰主婚爲女良獨苦爲
婦無所歡雖云安義命能勿隱悲酸更以阿父歿一哭
摧心肝臥疾遂不起藥餌厥惟艱道路猶太息況在骨
肉倫阿姑意淒絕阿母心惻然阿叔走問狀奄奄一息
存含淚指所生痛絕無一言醫養兩不及綢繆愧未先
撫孤易爲力起死無金丹何時隴西子解廢蓼莪篇

葬兄

去年掃先塋阿兄望我至繞塋立左側顧言此有地其
聲猶在耳其歿已易歲壙穴遵前約邛隴成夙志乃知
精爽露沈痛非嬉戲傷哉罔極恩惟兄報一二不識生

所養但看死猶侍鳴鳩相和鳴喬梓日蒼翠從今賢子
孫掃塋當思義

呈方有堂方伯

名積安徽
定遠人

奇功小試守梁山一創金湯障兩川大帥傾心煩指畫
諸軍計日靖戈鋌城完壁壘櫻譙縱野斂芻糧困李仙
聽說盈甯歌百堵盡教鴻雁得安全

石壩山前戰鼓頻攻虛奇策果如神從知鑊馬金戈地
終要輕裘緩帶人一面獨當揮白羽孤軍深入破黃巾
饒歌槃舞添詩料奏捷歸來格律新

碧眼花羣蠹不靈旌牛徼外賦南征攻心計熟籌邊日
勒馬歌翻出塞聲白芳用奇踰甕井青唐失險獻瓢笙

歸鞭記度我眉頂五月披裘雪洗兵

早建奇勳結

主知秉圭猶未拜丹墀諸侯肆覲明堂日百辟從封泰

岱時

公於五臺陸見

異量絲綸光簡冊外臺屏翰返旌旗銜

恩倍勵勤民隱記讀蒲州道上詩

送宋梅生夫子觀察粵西卽題東園話別圖卷

我年未及冠受知陳與徐

謂鍾吳海帆兩先生

感奮弄翰墨黽勉親

詩書旣冠擢鄉舉出棧登公車培風力未厚鍛羽還故

居二公一以去途窮形影孤維公見憐愛霖雨甦焦枯

平生數知己輾轉藏區區強半屬江右信有前緣無

憇園春風多桃李一千樹開軒見凌雲九峯互吞吐小

隊閒出郊一艇翦波渡拄杖大佛頭足底濤聲怒隔江
數炊煙民氣日生聚苦心人不知但謂登高賦東山謝
安石西湖白太傅文酒恣跌宕德澤已宣布不見餉耕
圖熙攘有真趣

後堂坐俊彥我爲小弟子白面擁皋比兩飲玉津水豈
有驚世名依託及門耳江流百里間時復得御李春晏
隨冠裳夜雪授經史勗我有造就趣我束行李迢迢試
南宮一別五千里誰知鼓鬣鯨又作暴腮鯉慚感仍故
吾十年一彈指

善政非一端愛士乃其最廣厦千間寬布裘十丈大蜀
士但知名不在門牆外儲材念造始毓英使循次嘉陽

兩講院開初良匪易堂舍與膏火經遠籌不置延師妙
精選督課趣講肄幡然士氣奮不忍輕暴棄雲路一以
開飛翔各翺翺銜環知何人臨風一長慨

戎州有石室培新自公手所遇畱惠澤不在暫與久我
當庚午歲硯食課儕友飲水思其源共稱前太守側聞
攝觀察瀘陽紆青綬扁舟泛黃花九月爲公壽小住十
日餘舊業重指授躍冶金不頑經雕木不朽丹鉛存簡
編什襲感高厚

十載不改官飽看我眉雪高寒春不到與公兩皎潔恭
逢特達知遠秉監司節湘灘分合間秋水各澄澈江
山更盛衰人情互悲悅士惜名師去民痛慈母別豈知

公惻愴亦復難陳說投筆百韻成用以代喉舌意足言
故長情真氣不忝想見渾酒時手快心迴折遙遙春陵
行千古歎雙絕

忠文與清獻三刀夢常續西川迴翔地惟公繼芳躅簡
易端治源風雅絕塵俗所被在嘉州所感在全蜀聞風
動相慕隔境遙瞻矚念茲蚩蚩情天當順民欲小別路
雖遠未盡緣可卜初至馬驅五重來纛張六我夢隨公
行棧雲碧如玉我夢迎公還峽水縐如縠

岳牧行入 覲祖餞盛一時勝地集良會名園隣墨池

賓爲新觀察主是前監司

東園爲鄭靜山觀察別業

僚友及幕府冠蓋

何巖巖要以氣味接不在官與師酒闌各神王韻事爭

新奇拂紙或作畫

沈少雲繪圖

分箋或賦詩

譚鐵簫別駕嚴麗生孝廉皆有詩

或點

筆爲記

楊蓉裳農部作記

或按拍成詞

鄭靜山觀察填詞

蘭亭西園外此會

良已稀而我困塵事未得身追隨展圖一再讀恍若親見之長吟附幘末感述羞支離

題沈少雲洗六齋詩集後

鬚眉皓白地行仙一卷聲詩手自編作客不離開府幕

歸耕難得辦裝錢人當杜老游秦後

君自蘭州就聘入蜀

詩是香山

入蜀前

是編皆未入蜀時作

欲倩彩毫重點綴草堂茅屋補新篇

陳望坡方伯葺竹虛石介之軒索題

名若霖福建人

寸寸虛心面面真聊從竹石現全神勤求訓誨方知治不廢圭稜廼愛人長慶集中幽翫意會昌詩裏塊然身

雲生觸處陰成畝看取敷撐大地春

寄贈陳雲鵬參軍時方從軍魚通

名廷璧
貴州人

俠腸自然熱不在接杯酒壯志何其遠不令折楊柳二
月從軍行西出桃關口山衝木梯上水跨索橋走硯房
豎層塔皮船坐軟白不知路險艱但覺神抖擻草檄書
據鞍殺賊刀在手想當請纓日氣已吞羣醜昔有高達
夫參謀展抱負西徼隨旌麾東川分圭卣人謂詩通政
其實無不有載咏六月篇千里遠翹首

哭馬司獄揚

春筵寵牡丹秋飲就叢菊兩度索我詩我懶不一復甫
欲從君歌忽已爲君哭茫茫人世間眞如隙駒速嗟君

負逸才少小困場屋卑官聊自污不爲升斗祿尉佐苦
捕緝掾吏嫌案牘刑名盜賊外引身職司獄青犢雖威
猛善守不馳逐坐看虎豹跳磨牙飽獐鹿餘生或未罄
用以屬吾屬仁心苟不固亦可惟所欲而乃撫瘡痍不
肯事腴剝徒然張大口未嘗一果腹坐此宦夢老身世
兩局促憶昔西徼行直到東天竺雪壓蠻碣青冰染藏
河綠繩行雜花裙梯度聽畫角殊方恣奇筆馬背手親
錄一說繫一圖康藏衛在目桑欽酈道元經註真可續
歸來闢官舍標言亦易足區區一畝間匠心穿九曲池
沼分東西樓臺忽起伏園成詩亦成五字何卓犖所蘊
未得展舉事已絕俗骨傲故不貴才清乃無福季札交

徐君不以死生慝此詩如彼劍酬知志在夙招君未葬
塊聽我吞聲讀

王西躔司馬屬題畫蘭

一花一美人一葉一君子風格何翛然幽香燦十指寵
植華池邊隱居深谷裏遭遇良不同氣味總相似欲效
同心言巴人愧下里

壽外母朱安人六十

海內何茫茫平生幾知己眞賞離風塵落落數公耳巾
幘而鬚眉巨眼惟外母叶我當未知名落拓走鄉里韋
臯家本貧陳平貌空美擇婦雖自精求婚或見鄙張負
苗夫人卓識世有幾母也何所憑卜鳳心獨喜結褵遣

愛媛繼室又嬌女見解不中撓恩義洵無比白髮風蕭
騷返哺愧半子

神巧本天授觸手成五色垂髻勤女紅挑燈不肯息尚
憶趨庭過中懸徑丈幅離奇百壽字蛟龍互拏攫阿耶
顧之笑縮繡授寸帛黍粒千鍼心毫芒一綫迹却從微
平微點畫見筆力才華不炫露教誠自整飾偶然論前
事歷歷數故實乃知曹大家胷中蘊載籍

母也于歸日外家適完盛中歷五十年人事漸紛競繁
華戒厥始澹泊守其竟黽勉相夫子始終惟一敬推愛
及同氣所欲力爲應雙雙玉條脫煌煌金背鏡或以援
叔急或以順姑命旁人昧大義交口恣詬誶豈識仁者

懷悱惻猶未靖坐此生計促流離雜貧病獨有區區心
仰對天宇淨

欲搏爪必拳將飛翼先伏萬事機相反賢者逆而卜母
家雖中衰積厚從疇夙有如歲寒時松柏凌霜綠根株
春欲回枝葉氣俱足繞膝看兒女骨相非碌碌賣盡民
間田什食天家祿舊志終可伸但令勤誦讀我聞母生
日萬方佛初浴苦惱諸相空慈悲一念篤願養歷劫身
坐受無量福遲之四十年聽奏期頤祝

題趙仲穆畫蘇卿牧羊圖

一節之奇千古快一事之失千古慨蘇卿但知身屬漢
王孫底用國封魏阿雍畫此豈有意何乃不爲尊親諱

畫意不可知畫工良獨奇飛霜似上老臣鬢平沙欲沒
枯樹枝黃雲亂卷節旄脫酸鼻屹立邊風吹塞雁無書
傳未死羝羊不乳何由歸嗚嗚角聲起匈奴獵初罷雕
弓羽箭橫腰胯虬髯鬚鬚聲叱咤別有空騎出隊後似
是單于遣相迓但使肝膽稍變更遭遇豈出李陵下左
校王博隴西羞雪窖臥免世人罵事本可傳畫亦佳筆
力欲突松雪齋偶然墨戲須檢擇立身大義胡可乖圖
成倘使而翁見夢交葉李俱非儕滄桑變幻幾回首漢
耶元耶復何有此畫歷劫誰寶藏乃與蘇卿同不朽

心知堂詩稿卷十四

成都汪仲洋少海

匏繫集下

起丙子正月迄丁丑九月成都及京師作

和竹有春日偶作原韻

俗情雅愛像生花不識春畱處士家未易移栽眞老樹
何須搖落嘆蒼華蒼華髮神竹有異蒼故云新詩走筆成郵訊小飲挑
錢借畫叉應笑江鄉仲庭預火爐金箸穩生涯

顧師啗畫一俗相者持劍怒坐一僧相旁侍進鞘

屬題

是俗非俗僧非僧食肉漱口常誦經

師啗有食肉誦經圖

貪癡已斷

猶餘瞋手中劍氣寒於冰此劍由來非鐵兵色相皆空

八夕言卷一
一
銛莫名慧性鎔冶新發硎縱未出匣光已騰諸魔擾擾
敢憑陵污鋒毋乃虞臊腥豺狼狐狸誰重輕誅不能盡
氣轉平干將昔聞北海評醜髀莫解師賈生我自露刃
我藏稜彼僧與俗知此情

題沈少雲芳心自賞圖

沈郎老作諸侯客鶴髮童顏年半百西踰隴右南滇南
東窮山左北直北閩海沅江餘舊游黃磯赤壁有陳迹
逢迎到處皆公卿出入尋常看棨戟邇來乘興更豪宕
高踏棧雲入梁益嘉陵早撫吳生畫奇字重啟揚雄宅
浣花拄杖偕妻子幕府青袍似疇昔酒酣耳熱詩思湧
眼光直射峨眉雪羨殺放翁依石湖却怪杜陵錯高適

彈鋏肯被游士羞濫竿漫博世情憐可憐囊中三尺琴
高齋獨對清秋月心手相商良有情形影之外更誰識
從來皮相非知己得一不恨古語激我亦風塵骯髒人
廿年筆耕當力穡書畫二絕輸君長獨有狂歌差相敵
五舉賢書不得第胸中枉貯匡時策豈無薦士如昌黎
動被放歸猶孟六叶羨君已掃求知心愧我尚爲科名
役騎驢出棧又勞勞未卜榜花開五色要當初心不自
負還君此圖三太息

將有北上之行慨然而作

不及負米養又無椎牛祭哀哀三十年吞聲暗隕涕百
拜辭墓門行當赴計吏不第患飄蕩得第虞畱滯依依

諒兒心惻惻想親意松楸如有風枝葉雜獻款忍哉溫
嶠裾愧絕右軍誓

往時買公車束裝兄先笑預祝駟馬歸毋學馬卿傲今
日買公車束裝弟先悼如彼孤雁飛形影自相弔人命
嘆浮漚功名羞媚竈兄歿原不老我行今非少遙憐九
原心猶望泥金報

我非馬伏波何能戒兄子區區猶父心千古諒如此念

茲遠別離莫作風過耳醫業原仁心

希賢業醫

算學有微理

景賢學算

但能竭智力亦可名一技莫猜棄取心督厲當知

恥不見楊遵彥銅盤寵莫比

時攜宗賢同行

惇獨憐寡姊衰病哀外姑貧困嘆邛嫂三人俱無夫不

忍相對泣但覺衣袖濡念別各傷老情懷亦自殊會意
不在言慨然心有餘賤日尚相顧貴時甯自娛未知晏
平仲能贍三族無

五年不出門燕婉如新婚因君念阿姊典型殊虎賁心
慧口偏訥儀淑氣自尊道異柳下惠能令薄夫敦閨中
得良友坐對捐塵紛雅有英雄氣渾無兒女仁揮手事
遠志努力褒芳春

嬌女知我行抱頸不教起嬌兒知我行繞榻呼不已乳
母袒懷來懷內抱中子牙牙語不清兩手東西指似解
斯須別動輒便千里撫茲心默然強笑不顧理趨庭與
咏絮何時課爾爾

棧中題楊對山同年詩後

名燮四川成都人

劫火燒難盡應知筆有神君行束裝未我又出山頻擾
擾餘陳迹勞勞笑此身題詩近褒水蛟鱷莫生嗔

往時余在柏林

薛題壁詩已為山水衝決

四十自壽

疎狂幾見到公卿卅載頭顱氣始平肯被才名誤科第
憑何福分揜聰明文章報國原無價事業經時在有情
弱水茫茫三萬里試從鯨背望蓬瀛

得家書知子北上後二十日舉第三子名之曰進

賢志喜寄內

離家念分婉魂夢日顛倒書來欣無虞呱呱已襁褓連

舉丈夫子何妨自品藻骨相較兄奇眉目較姊姣千里
請命名事欲不草草憶昔名兩兄字義而探討述願與
我肖邁願比我好今者意有進何以副懷抱卽此爲之
名遠志基少小鵬鷗高盤雲驂騑快登道跨竈猶平平
陟岡乃表表長慰阿母心榮名以爲寶

壽顏惺甫夫子六十初度一百二十韻

聖化覃布提鍾毓邁疇昔生才得間氣幾輩稱巨擘人
海何茫茫我公實奕奕周文遡遠緒邾武分宗祏陋巷
聖起家平原功開國詩歌曲水陳音義漢書譯扶疏分
千枝經絡只一脈嶺嶠梅花香羅浮蝴蝶翼遷當五代
初地是九仙側先世多聲聞中丞尤挺特領郡得岱宗

媒祀近鄒嶧履石降玉童吞霞啟金席慧業悟宇宙
年志竹帛端倪誰魑魍蠹沒自綜核糠粃百家理爬羅
六藝迹鴻藻甬會鋪幽思禕隋得文疑吐鳳雄口過雕
龍與明經手版新駕部頭銜易樞省恰同官帖屹不須
陟忠孝公無忝文武

帝兼廸秋獮巡木蘭春官執羈勒七埒試挽強一發竟
破的正鵠穿鰐蜃弓弦響霹靂

至尊許志穀宿衛驚貫革爰賜翎侯儀用彰射士德唐
家十五道漢代二千石宣化重外台循例作郡伯劉竺
白鹿車蕭蒨金鳳宅今人卽古人我職如彼職西江撫
字勤南詔監司迫溝渠遵文齊保障類霍弋啟啟民歸

心蠹蠹苗啟隙金沙石鼓喧銅柱鐵橋阨礮車開瘴天
花裙繫徽索凱唱歸滇池量移轉彭澤露冕揚前徽埋
輪繼異績人欣堂構成公惕箕裘責敲敲清風清放歸
白日白經通法律平民肥胥吏瘠開藩籓滌紅建節幢
擁碧江河換管領燕豫互送逆嵩高冰鏡懸沽淀金堤
搯總管纔黎陽節度又冀北協氣莫塡黷厖褫澹阡陌
三穗餘晚禾雙歧遍穠麥休烈紼邦畿流慶甸邊塞嘉
猷真逸倫湛恩本破格青宮備顧問黃衣荷殊錫
主存堯舜心臣盡臯夔力魚水歡莫名鴻風順何極失
官以公事遠戍走殊域寂寥烏壘戈苓戟玉關笛環句
月蝟城飲寧龍沙磧窄窳雪海寬趑趄冰橋窄漈冽黃

河源嶠嶠崑崙脊得泥羈幕孤瓶甌房仄焜耀明霜
飛溯滂硬雨滴惻怛勅勒歌醅醪酥酪食戍鼓窮西戎
邊笳靖北貊台吉古左校阿渾今伯克部屬射鵬兒招
徠貢馬客漠漠忘蹉咨躋躋甘遷謫肫肫感

聖明藥藥憫行役閶闔頌

詔書屢屢返戈壁瑩瑩金

曹案悻悻治河策皚皚監瀟湘鼓鼓司滇楚覃覃仍封
圻皇皇再圭璧金筑誦先芬羅甸傳新檄郎君撫舊衙
父老半相識繼美非紆青傳家是保赤作述民猶知內
外臣何擇司官封偶閒轉運任何亟時當雨浙旱民有
調飢怒倘非張永寬不救錢塘厄維

帝咨臣鄰我公膺簡冊發粟流徙還捐租士夫懌冷面

如周新長髯似蘇軾葑堤欲踵成竹籠不遑獲雨露始
溲漉雷電忽睽睨

聖心餘跼踈吏議在疎斥遂爾卸簪紱依然畫筮屐聞
說賦初衣躬親耕故籍節操貧逾堅性情愴不惑漫堅
水竹間佞忤風塵息還山夢早清閱世心猶惕昔我困
京華遭公得拂拭從遊界燕趙相對數晨夕荆關當面
雄瓜澗繞門激五字傳正聲萬卷恣潤色空洞心相照
譴讓口不默羣季舞翩翩癡叔笑啞啞鄰里驚驩呼杯
盤任狼藉天馬譬脫羈腐鼠誰能嚇彈指十三秋回首
東西隔亦有萍水逢渾如夢魂覲瀛海送蜺旌潞河迎
豹舄握手樂莫樂分衿適所適時光太匆匆情事猶歷

歷老鶴雖倦飛雛鳳初奮翮雁塔欣題名花磚艷候直
此事真跨竈舉家想慶額而我羞魁樞一官嘆局蹐不
學躍冶金空如就搏埴聊備人所需非如古應辟折腰
良可憐強項更誰惜任僚餘呼負儂係往堪憶二十歲
相長比勘數無仇公昔服政初我亦室家逼今公屈耳
順知我近不惑曩猶貢面祝茲乃寄心畫陳言去綺麗
奇氣湧胸臆南海雲萬頃東湖水千尺釀之作醍醐蒸
以爲醴醑一滴延長春十甕沾餘漑會卽耆英名堂從
畫錦關香山圖再補洛下例堪借功名已不朽風義更
無數韻事博歡飲佳話預攜撫遲之六十年康壽一倍
積祝公百二十我亦年一百

哭僕

僕人閆升本名耀宗陝西長安人初以健壯試武生冠其曹繼入行伍從軍勦教匪南山中數奇不得秩貧無以贍親乃變計爲人役敏捷無不稱使公車北上遂偕以行閆能挾輶掀淖以助御者故五千里無覆車折軸之憂其才力雖殊絕儕輩而無好勇鬪狠之習然亦頗矜詡善諧謔坐是不爲朋輩所喜而又無敢與角者乃爲惡奴張升伺其睡夢堪及洞胸猶能大呼奮起手自拔刃而死時丁丑五月十五日事也

關西勇士閆耀宗燕領猿臂睛如銅飲啖兼人不得飽

能騎怒馬彎強弓十八試材武十九從兵戎先登陷陣
裹賊戰迴旋標疾如飄風獻級褰旗未受賞改勦爲撫
難酬庸弓折馬瘡漫唱凱骨不封侯家苦窮牛衣不惜
泣阿婦鳩杖豈忍飢而翁憤激牢愁不稱意甘心僕隸
埋英雄前年見我成都市我壯其人知不同書生豈出
諸將上健兒乃逮羣奴中雲煙踏破棧南北風塵走遍
河西東往往敝車陷泥淖掀以出之如轉蓬古來車右
有若此何難百代傳奇功事同一轍報相萬人無十等
惟遭逢不爾摧剛爲柔者當時竟作朱家傭鷹隼苦飢
從鶴舞虎豹得食忘豺兇力不相敵乘間取殺人賊計
何其工操刀暗伺斲聲落魂夢未醒刀堪胸奮臂大呼

手拔双回身作勢如櫻鋒餘威震落小醜膽踰垣折足
何匆匆張瑜垣折足旋為邏卒所獲我起呼救已不及但見血花飛亂紅
嗚呼但見血花飛亂紅當時恨不戰鬪死國殤猶得祠
昭忠

傷哉行送閭翁扶其子櫬回秦

以兒爲命老翁老以夫爲命巧婦巧以父爲命小子小
傷哉一家之命係一人不殺之殺尤可憐忍絕鋼刀是
何物鰥寡孤獨頃刻間我欲起死無金丹我欲賑乏少
金錢傾囊殞殮更議恤函書欲達心先酸翁聞其端痛
欲絕招魂千里淚成血鋒鏑不到刀無聲翁孫弱息心
披磔踉蹌拄杖走千里孫啼婦哭畱不得我聞翁至驚

且吁翁子有靈哀何如首邱之計誠在我哀翁老病奔
長途亦欲畱翁博飽暝童孫弱息門閭孤念我魂夢隨
翁去入關早寄還家書

閭翁繼以其子葬於彰義門外陝西義地而以所
賻歸養既許其請詩以哀之

輜車欲發忽勾畱何處青山非首邱可信達觀同季札
邪無遺愛類楊彪死猶孝養魂應慰骨有鄉鄰鬼不愁
彰義門西馳道北白楊蕭瑟恰驚秋

陳午垣同年侍者靜蘭從予學詩度曲偶索吟贈
爲成長句

也愛清歌也愛詩二分聰慧一分癡情懷似酒誰能醉

氣韻如蘭不在吹燕市夜寒風悄悄吳船人遠夢差差

催粧學得香奩體鵲渡雲軒定幾時

靜蘭蘇州人訂婚未娶

漫邀檀板按新聲此事如詩在有情樂府才華原綺麗
佳人吐屬自輕盈衣冠傀儡登場易磐澗謳歌識字清

一曲陽關纔入破依依送我出春明

時子授靜蘭折梅陽關等曲

恨不分身有替身花枝手檢故鄉春

靜蘭有異日於吳中爲覓一妾之語

芳心

宛轉眞憐我綺語纏綿太感人染髮幾時調陸展浣紗
何處訪施顰錢塘虎阜無多路證取尊前未了因

和次黃香初孝廉見簡原韻

孝廉名榜閭僕之外兄也

棧道雲煙峽口風南船北馬笑飄蓬題名到處詩空好
對策頻年籍未通眞賞每邀塵壑外窮愁例在客途中

銅絃鐵板誰能和縱筆輸君七字雄

人間難得老萊衣莫戀名場未肯歸瓜蔓水邊迴故國
蓮花頂上和雙扉遙知采杞詩重和定見乘槎願不違
嗟我瀧阡空悵望劍門西上白雲飛

奇窮不撰送窮文老驥埋頭冀北羣跡弛十年仍伏櫪
馳驅百里當凌雲平心游夏猶爲宰藉手湖山好報

君元白唱酬何日續錢塘江上關詩勲

函谷青天一綫窺入關時日計今茲河聲撼耳山形斷
海色翻空日影垂前路有時逢舊雨懷人何處慰相思
秋風落月如迴首檢取奚囊別後詩

中秋夜望月寄內

一鏡平分萬里秋山河倒影壓人愁誰從玉壘來燕市
却上金臺望益州縮地無方愧凡骨經年小別悔羈遊
還家念遠如相夢遮莫離魂錯道周

涼風卷盡碧天寬大海飛來白玉盤獨把壺觴消永夜
遙憐兒女話長安鐙邊小影參差樂醉後高歌旖旎難
不識望舒三五易何年今日許同看

得陳芝山夫子手書走筆代柬四十韻

禽以羽毛奇花以氣味寶靈蠢與香臭萬口無一擾如
何人衡人同類多顛倒文章心印心以目爲介紹目光
根諸心成見要除掃或者理趣別兼之讀書少瞠目如
醉夢五色迷盲眇至乃面若面皮相一瞬瞭竟若衡文

難不似格物巧如我與先生相較亦易曉涇渭分清濁
鄒魯辨大小有目所共知平心無庸矯豈謂乖擬議初
不類品藻縣令雖美秀詩酒圍懷抱廣文實奇偉經濟
露儀表萬事遇相左何由問洪造先生笑掀髯首肯從
今飽轆轤雙車輪北出上郡堡邇來易寒熱秋雁傳書
早長跪啟絨讀情事何清皦榆塞秦城還龍門禹蹟討
呂梁踐飛瀑華嶽捫清昊倦遊欲返轡棧度劍門道回
首別荆花入門媚萱草課士兼課兒奇氣不能了元龍
臥湖海同甫嘆衰老慷慨鬢髮蒼咨嗟憂思悄直恐年
命促遙愁離合杳此語悲難聞祇使我心擾我雖膺一
命折腰先懊惱逐隊事上官藉手虞旁撓困躓傷年年

兀傲減稍稍新例雖許試灰心不應攷聊借西湖水傀
儡胥浴澡念茲欲邁行空囊困燕趙賴有居停賢西江
潤枯槁買車出春明計當九秋杪卸裝應十月芙蓉開
窈窕芙蓉在杭州詎若錦城好魂夢飛故鄉座想春風
繞

將赴浙中畱別圖靜菴員外

捧月得奇夢

員外嘗夢
捧月而行

雲侵衣袂涼魂魄與之化表裏生

明光身騎蟾蜍背手弄丹桂香下視九州小一氣煙蒼

蒼駭絕遽然覺妙悟天開張筆是修月斧敏捷誰敢當

朝餐習歐柳暮食摹鍾王寓目輒有得心手終不忘亦

復工歌詠洒墨何琳琅淵淵按音節髣髴聞霓裳充積

縱所至此才胡可量佳夢不忍負伏案心皇皇

尊翁秉旄鉞節度東西川開閣引俊髦爲汝陳言詮我
時臥鄉國持筆耕硯田虛名荷薦達束帛來芟芟勢若
石投水機當山出泉旬月已孟晉筆致驚翩翩姿性旣
卓絕嗜好俱能端百城擁書室千金求畫船食饌卻珍
異被服羞華鮮勢分忘貴介氣味如酸寒外渾而內慧
初不關學然攬古多閱歷益以全其天

相攜五千里笑汝眞從游朝發錦官驛暮宿越王樓南
棧鑿龍洞東川開鳳州山川遞險快雲氣爭綢繆君衣
打我面我踵連君頭細路太逼迫迴梯更勾畱傑倬略
相讓杳焉忽寡儔隔雲聽馬蹄隨聲不可求林表露烏

帽一笑開雙眸奇景盡不到新詩時對謳此樂如可再
畢世願周流周流忽不願苦樂良難侔

前詩未卒吟而靜菴忽聞尊翁春暉制府之訃同
日出京分投蜀越再賦十二韻唁之

去年芙蓉開與君辭錦城連鑣載行李蹴踏風雲生今
年芙蓉開與君出燕京分袂悵離索相看淚波橫奔喪
路萬里麻衣如雪明哀君獨往返我不偕君行我豈不
念君官符限我程我獨赴浙去知君難爲情君情毋我
縈君身毋自輕忍哀當大事繼志揚令名豈惟報泉下
亦以慰友朋萍水與鴻雪他時應合并

畱別都中知好

一回聽榜一心酸蜀道青天進退難三十六宵眠矮屋
五千餘里赴春官昌黎薦士豈皮相已已薦於楊北海先生
辛未薦於余鷺門先生
羅隱渡江空淚彈未領刑書猶許試憐才惟感
聖恩寬

先皇恤士用旁招剋例三科許大挑始信糊名無定賞
纔從覲面露清標藩王器異頻垂盼宰相咨嗟爲折腰
免卻泥塗仍出宰滄瀛惆悵是回颺挑河工日成即欲以入
選董蔗林相國吳淞浦
尚書有此人太好河工
泥塗不如畱下之語

天台春色鏡湖秋不當之官只當游山水已如蓬閣好
文章宜借簿書求名經往日尊千佛實政何年出一頭
未必白蘇成絕調試將餘韻譜杭州

酒到離亭未忍斟
京華朋輩半浮沈
狂奴詎減凌雲氣
俗吏真慚過夏心
臭味由來不差別
雲泥無事苦推尋
風塵亦有登仙路
證取他年筮盍簪

心知堂詩稿卷十五

成都汪仲洋少海

渡江集上

起丁丑十月迄己卯七月道中及官桐廬時作

出都

居然攬轡出春明
俗吏何妨骨相清
回首更無淪落感
此身原未到蓬瀛

趙北口

不知秋遠近黃葉響蕭蕭
水合東西淀堤分十二橋
魚香隨箸滑帆影隔林邀
絕好江鄉景惟差竹數條
一逕蓼花落瓦橋
秋滿關盡收河北水
遙跨海東山地險
詩逾壯才雄氣自閒
從來經濟意只在宴游間

日華宮

日華宮罩瀛海水二千廣厦春風裏獻王領袖漢家儒
賈董馬鄭從此起旨哉班生修漢史不與淮南吳楚比
劍俠殺人族滅爾雞犬上天身死矣嗜好不端迺至此
富莊驛舊有蜀女鵲紅題壁詩余分修四川通志
時編入列女才藝重經是地感賦二首

傷心蜀女題詩處十七年前我見之補入升菴藝文志
未知姓氏是伊誰

崇明譙縱賊氛盡李順王均兵氣驕寄語能詩蘇蕙子
鄉愁何日始能銷

欲訪李白華秀才於濟南不果行次德州遙有此

寄

泰山觸石雲裁眉太古雪空際五千里相望兩奇絕春
化雪爲水風送雲出穴昭質原無虧行藏總皎潔雲向
西極飛水向東溟泄中途不期遇雲水互相悅雲飛自
輕妙水泄多宕跌浮沈忽相錯雲水從此別爲霖雲願
虛赴海水勢折同心不稱意念此肝腸熱

七十二泉水滙爲大明湖中有厯下亭四面栽芙蕖紅
粧照清鏡一一美且都吹香好風過醉我如醍醐東道
得名士招邀繫白駒詩成一按拍擊碎青珊瑚十日平
原飲跌宕開行廚但患酒腸窄不知世路紆彈指十七
載此樂真須臾引領夢飛越相思無日無

君家住齊門我客游燕市春來雁北飛遞到書一紙君
以筆代舌我以目爲耳開緘如面言一氣瀉腕底憶我
與君別都未問婚禮但矜鳳生雛殊愧馬增齒婚嫁累
向平能不壯心靡生才負天地中夜百憂起

顏子樂簞瓢亦賴負郭田陋巷雖堪憂應有屋數椽而
我貧徹骨筆耕二十年祿非晏平仲三族義莫捐裒益
數相遠用情惟不偏嗷嗷衆口餓逼我離故山念茲渡
江去未知何日還走馬繞齊境相違百里間訪戴忽不
果說項嗟徒然君抱過門恨我悔徒伴牽

高唐

豈獨綿駒是善鳴秋蟲春鳥各新聲五朝雅頌知誰譜

百里絃歌試此行振俗自然需絕調感人無過要真情
淳于謬耳知多少肯爲悠悠動不平

東阿道中

大河橫斷萬峰低谷道崎嶇脫馬蹄記取東阿南去路
略如靈寶赴關西

更無父老識英雄卷裏陰符讀未工看遍穀城山下石
不知何者是黃公

汶上

閔辭季氏非辭宰汶上微言自有真倘使聖門羞作吏
彈琴百里又何人

俗眼難容強項令深情預計折臂時無須更讀循良傳

辦取心如準字池

滕文公祠

文公諡法誰無忝善國餘風此儼然質在齊宣梁惠上
生逢王熄霸衰年真能祖免行喪禮恨少山川畫井田
日事戰爭無廟祀七雄回首儘堪憐

王家營渡河東張漁璜同年

原名懷渭易名師
愷四川漢州人

黃能殛後元圭錫滾滾河流幾度清萬古宣防兼導壅
一家功罪不分明獻策誰能師賈讓占星我欲問張衡
箕斗之間推析木銀漢何時水氣平

揚州弔潘石甫時其子大經已舉秀才因以石甫
詩稿歸之

一卷人間未有詩十年眠食不曾離

石甫詩自丁卯三月藏子篋中吟成絕

命吾曾見字作思親汝豈知

石甫彌留之際吟贈友朋及其門徒六七人名有義意少頃舌強以手作

老母字而逝

殊愧陽冰受遺稿猶欣騎省誕佳兒杯棬矩矱今

相付要發而翁未了奇

瓜洲渡江望金焦二山

蒼茫浮玉是耶非寶塔凌空水四圍客路十年勞夢想
鄉心萬里近江歸夔門灩澦形差擬海上蓬萊願尚違
砥柱中流原不少誰從漂泊認依稀

金山東望卽焦山一點濃雲壓海瀾幽境似聞游客少
浮生須據要津難銘傳瘞鶴千年壽鉢記呼龍五夜寒
我欲雲棲最高處泡漚世事不回头看

戲東洪告甫孝廉

壓酒吳姬十五多
棹船低唱懊儂歌
鴛鴦只願湖邊住
不作家雞當奈何

與徐侶樵

名起渭
貴州人

孫鎮山

名榮積
四川人

兩大令出候潮門泛

舟游六和塔作

領畧西湖未看江
心如潮水不能降
一船簫鼓春同載
隔岸雲山綠滿窗

白雁渡江潮不來
冬青樹下骨成堆
誰知七百年前事
寶塔巍然是劫灰

東史雅堂大令

名默江
蘇人

燕臺驢背一揮手
君返江南我劍南
萬里何嘗離夢寐

十年殊未達郵函不羞下吏踵前轍要與故人占盞簪
江上潮聲湖上月銜杯且復興同酣

初至桐廬

四十功名嘆積薪宦游纔作代庖人官如傳舍何妨攝
政似文章只要真是豈故鄉多水竹雖然下吏不風塵
飛鴻散落籌安集肯枉青山領富春

數家煙火逼江橫小縣荒涼不見城疑獄總宜經術斷
囂風惟賴善心平民如種樹誰知養政本通詩在有情
百里絃歌徵和答可能容易矢先聲

贈呂月滄同年

名頊廣西永福人

時宰奉化

氣韻光華不在衣狐裘卅載亦吾師人如古器須眞賞

政似高文只自怡循吏從來辭上考書生幾見合時宜
風塵駛馬知多少冷眼看他更駕時

臨海道中

刺水秧鍼乍露芒肥田先事有奇方星星絳雪迷離甚
一路茗花晒夕陽

紛紛桃李謝芳華過眼春光手漫叉風信不知過廿四
深山猶有杜鵑花

兩山相逗白雲間雲裏行人日過山忽地鄉心飛萬里
恍疑身在七盤關

龍車未若筒車逸水磴爭如水碾新欲向老農商利病
宦游原是種田人

梯田高下抱山斜却向平川種芋麻豈識年來絲價好
杭州遍地養桑極

洛中游後懶題名草草勞人笑半生只有看山青眼在
雲煙佳處總關情

題吳節菴天台踏雪圖

我家遠在峨眉巒八十四盤盤到天太古之雪不得化
千峰積玉雲中攢偏當炎歊更奇絕白日燦射光芒寒
有時剛風逞狡獪倒卷散作堯羅綿五月披裘晝苦冷
羣僧荷鍤朝開門遙見青衣江上水一綫迴環東海奔
天槎浮浮落吳會杭州小住經三年湖山殊少丈夫氣
惟將秀絕邀人憐昨來渡江探禹穴亦復所見殊所聞

掉頭急走章安道意中爲有天台山管領名山有名士
延陵季子何翩翩作客久住天台麓還家時度天台顛
卷堂輒在冬春際霰光欲動元陰連馬毛蜎縮童僵仆
獨步華頂凌雲端下顧四萬八千丈精神飛揚如欲仙
赤城凍爲素壁屹飛瀑化作玉龍懸好事作圖者誰子
王郎沈郎相後先我旣見君如登山我旣讀畫尤知君
胷中貯得太古雪眼角抹盡千峰煙惜哉鶴筆風立時
我未飈車來拍肩何當騎鯨泝江水雙栽決昔天地間

自天台至斑竹

春風處處是桃花懶向天台問酒家別有癡情餘夢想
石梁飛瀑赤城霞

曾聞天姥向天橫
臺耀金銀掩赤城
不合身從山下過
千年好夢讓長庚

三間樓閣倚山陲
坐對雲煙落酒卮
風塵亦有清閒福
只在停鞭肯駐時

題朱遇青畫照

秋色澹如此
秋心知更清
孤松有雲勢
叢菊養詩情
那得鰲同擘
相將畫裏行
奚奴殊解事
杯盡酒頻傾

前得家書眷屬三月下峽計程日內可至久無信
息書此誌悶時己卯又四月也

骨肉本天性
孰云兒女情
矧聞下三峽
趁此春水生
越蜀七千里
順流舟本輕
計數兩踰月
繫纜杭州城
如何

久不至念此心屏營我夢沂江水如潮來逆迎中路忽
相遇全家助笑聲溫存慰鄉里撫摩遍甯馨遽然一以
覺孤枕鐙熒熒奇想涉顛倒百憂爲之縈不怨遲日到
但祝江水平團圓及蒲節相對啖臯羹

五月朔後九日內子偕兒女暨景賢姪隨同外兄
朱亦張維衡昆仲抵杭詩以誌喜

蟾子夜縈壁乾雀朝噪簷氣機物先得佳兆無須占果
聞萬里舟已卸百尺帆江干走相迓團圓樂且湛慰問
嬌妻瘦調笑愛女慙述兒知跪拜弁短毛毵毵邁兒歲
及四進兒年甫三投懷見天性旁睨仍生慙季姪述家
事兩舅喧鄉談骨肉久相別焉知聚江南却顧萬松嶺

迴念百花潭

呈惺甫夫子卽送北上并柬魯興太史

路河一揮手十載更秋春豈意重侍坐乃在之江濱之
江跨吳越西湖天下聞白蘇遞去後湖山氣不振坐令
葑菱積滋蔓陳陳因淤塞勢不已湖心揚飛塵詎念六
閘外田禾望澤殷夫子舊持節念此心如焚翦伐更淘
汰湖乃還其真功成不受賞去思猶在民

當公撫浙日我乃成都住及我渡江來公返連平去紆
遲失依託離奇慨遭遇昨者權桐江窮鄉值要路前令
吁可憐逼迫無所措母老子復稚投繯死不顧念此心
慘傷不忍苛細故詎識從井救幾至立牆誤亦欲歸去

來更無五柳樹

燕許大手筆體用俱宏通世艷勲業懋豈識文章工趨
庭丐餘潤後起猶稱雄鰲頭立海水鵬背搏天風

帝命操玉尺蜀材爲之空廬陵詘險怪昌黎起衰癯耆

宿各奮發爭投珊網中鬚髮半蒼白拜此黑頭公并有

故人在暗裏摩挲逢爾汝笑平日北面忽改容

謂李小山懋
寅陳秋聲

公昔資我歸鸞膠始得續我今迂公拜兒女粲相屬送

江直入海浮家力豈足舟楫賴使星趁此春水綠當其

下峽輕公亦度嶺速同日到杭州此喜誰能卜

五月初十日公船甫

由錢江北抵閘口而予眷
屬亦由吳江南泊武林兩世被慈惠萬里聚骨肉骨肉情雖

親知遇恩尤篤我欲隨公行身苦一官束我欲迎公還

星臨一道福

贈李海帆大令

名宗傳安
徽桐城人

時宰上虞

雅化絃歌易微員骨鯁難使君能執法儕輩勵當官力
被鄭僑惠心逾黃霸寬他時展驥足攬轡聽和鑾

贈徐呂樵同年時宰餘姚

魁梧兼磊落意氣稱其人豈有經時略惟堪出宰頻資
格困成例飛騰羞要津折翬良不慣祿養且娛親

餘姚舟次遇雨

驟雨濺驕陽翻空海氣涼蛟龍曳雲戲帆楫却風忙潄
暑倏銷散青天仍故常惟餘江上水激灩霽清光

宿廣福寺

野宿漫停驂空山只草庵生天原是劫彌勒許同龕解
脫詩如偈圓通夢易酣由來此身淨不待住精藍

桐巖

臨海寧海
交界處

一徑如脩蛇蟠壓山煙破行人如游蠃直循蛇背過蛇
背何蜿蜒迴折恍旋磨不肯逕入雲掉尾誰能奈十里
亘天險九盤互遮邏鱗甲變磴道淩滑苦傾墮足縮胷
環環絕似驢背馱山椒造平曠乃有開門大遙想甌越
爭百萬城下挫今者治無外九有通貢貨陟險無戒心
喁于行倡和

題張幻廬所畫括蒼煙景團扇

括蒼山週三百里西接天台東壓海中間拓作章安城

餘勢猶有峰巒在大固小固山相連凝香宴海樓對待
巾子翩然如恰幘臨風欲墮千古駭下有神龍蟠井底
深夜往往吐光彩試從破曉登高望不見人家但顰蹙
全涌如潮鋪過城雲非雲兮水非水塔影出沒搖參差
山椒浮沈露蓼葦好景離奇摹畫圖意匠慘澹訴真宰
卻借班姬小執扇尺幅萬里聊揮洒定知五百年後人
誤認神山湧渤解

己卯六月十五夜望月寄內

我從丙子九秋杪辭家直走劍門道三年羞對明月圓
孤舟愧向異鄉老君買扁舟下峽來送江入海膽非小
七千水驛七十日

內子于前四月初一日自成
都下船五月初十日抵杭

三子一女勞懷

抱作吏乃不如諸生款接妻孥殊草草吳船忽爲私恩
送越嶠又迫公符擾南來北去離杭州兩度又負月華
好人生看月能幾回念此祇覺我心攪銀河耿耿秋爲
期歸裝或及鵲橋早

太平鄭園頗有花木信宿而去畱別主人鄭翁

我聞鄭公臺乃在靈湫下翁豈其苗裔園亭復都雅軒
牕四面開籬落敞長夏招邀城外山飛翠壓簷瓦花經
抱甕澆棗任持竿打半畝澄漣漪五色魚瀟灑熱客愧
幽境信宿識長者風流追昔賢而翁世所寡擬以蔡鎬
宅願結梅花社

黃巖太平道中

溪山第一小樊川彈指桑滄七百年剩有東甌遺跡在
如椽大筆寫天然

瓣香惟祝杜襄陽幕府青袍也自傷劫後銷除牛李黨
青山猶有著書堂

飛流直下靈巖頂界破山煙百丈垂抵得一篇懸瀑賦
亭名擘翠究伊誰

雲莊風磴爲誰開句不驚人負此來欲去勾畱仍小住
亭山館與見山臺

唐嶺東頭見女牆當時版築亦郎當不知何者成遺愛
廟社今猶祀偃王

觸熱匆匆六月來天南踏盡亂雲堆豪情一往難收拾

欲上總山望海臺

騎鯨未上瀛洲島控鶴今來委羽山第二洞天原不惡
祇應慚愧在人間

黃巖

山勢敞平川居然別有天龍風常拔屋潮水自澆田城
矮門如寶橋浮柱是船惟應蓬島近桃實大如拳

牧羊兒

剡溪舟次見岸上一小兒牧羊歸去哭呼哥哥
不絕愴然感之

牧羊兒年約八九歲手持枯竹枝頭戴笠子身無衣一
步一回顧一顧一聲啼空山日暮哥哥何之乃不與牧

羊兒同歸惻惻無所依淚下猶縷縻羣羊泚泚如有知
聲與牧兒相和悲兒勿悲羊勿悲兒不知聽者心更摧
哥哥不應我已七載空呼爲

夜發嶧縣用謝康樂石壁精舍還湖中韻

菰蒲翻星光詎識螢暉暉剡溪夜解纜游子思端歸豈
不憺山水探奇興已微纖月如愛客一鈎開煙霏却顧
水光外隱有山相依我無謝公屐誰扣西莊扉精舍念
石壁心馳還自違萬事苦牽制卽茲當類推